



NORTGEV, OV PALATINE DE BAVIERE.

NORTGEV s'appelle la partie de Baviere, qui est du costé de delà le Danube, & s'estend vers la forest de Boheme. La ville capitale en ce pais est Norenberg, de laquelle cedit pais, comme aucuns euident, a tiré son nom. Et combien que la ville de Norenberg n'est pas fort ancienne, si est-ce que le chasteau dedans la ville, situé sur la montaigne, iadis appellé *Castrum Noricum*, est fort antique.

En cedit pais y a plusieurs autres villes, chasteaux, cloistres, & villages, cōme la ville d'Amberg, Sultzbach, Auwerbach; le Cloistre Castel, où les Ducs de Nortgeu souloyent tenir la Cour: puis apres Eger, Neuwenstadt, Beyerut, Eystet, Napurg, &c. qui la plus part appartiennent à la Palatine. En ce pais, entre les villes de Bamberg & Eger, y a vne montaigne, appellée le Fiechtelberg, contenant six lieues à la ronde: de laquelle l'on prend toutes sortes de metaux, & singulierement beaucoup de fer, duquel tout le pais est aydé & feruy. On y trouue force couleur d'azur bleu. Au haut de ceste montaigne y a vne Mer, ou Lac. De ceste montaigne aussi sourdent quatre riuieres, coulantes vers les quatre quartiers du monde, à sçauoir, la riuiere appellée Meyn, vers l'Occident; la riuiere Eger, vers l'Orient; la riuiere Sal, vers le Nort; & la riuiere Nab, vers le Midy. Vous voyez aussi en ceste Charte la riuiere appellée Regnitz, & vne autre appellée Altmul. L'an 793. l'Empereur Charles le Grād entreprint de faire assembler ces deux riuieres ensemble par le moyen de fossés, à fin que du Danube l'on eussé peu entrer au Rhin: & à cest effect y faisoit besongner plusieurs mille personnes: mais par la continuelle & grande playe, qui tomboit du ciel en ce temps là; & pource que ce terroir est assez sablonneux en ces enuiron, tout ce que de iouron y auoit foury, fut derechef tout remply de nuict; & parainisi il desista de son entreprise. Vous voyez encores quelques signes de ces fossés aupres de la ville de Weissenburg.

NORICVM.